

UDHËZIM
Nr. 364, datë 16.12.2014

PËR PROCEDURAT E HARTIMIT TË LISTAVE TË ZGJEDHËSVE
PËRZGJEDHJET E ORGANEVE TË QEVERISJES VENDORE

Në zbatim të nenit 102, pika 4 e Kushtetutës së Republikës së Shqipërisë, të neneve 49, 50, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar dhe të dekretit nr. 8844, datë 15.12.2014 të Presidentit të Republikës “Për caktimin e datës së zgjedhjeve për organet e qeverisjes vendore”,

UDHËZOJ:

1. Ekstraktet e përbërësve zgjedhorë dhe listat e zgjedhësve gjenerohen automatikisht nga Regjistri Kombëtar i Gjendjes Civile, në afatet që parashikon ligji dhe janë të vlefshme për t’u shkarkuar *on-line* nga aplikacioni përkatës i Regjistrit Kombëtar të Gjendjes Civile. Procedura e gjenerimit të ekstrakteve dhe listës së zgjedhësve është funksionalitet i sistemit, Regjistrin Kombëtar të Gjendjes Civile, ku përgjegjësi i zyrës së gjendjes civile shkarkon nga ky sistem përbërësit zgjedhorë, për zgjedhësit sipas vendbanimit përkatës, si më poshtë:

- përzgjedh në menunë në të majtë të faqes së RKGJC-së, opsionin “Procesi i regjistrimit”, “Raportime” dhe zgjedh listën.

2. Nga Regjistri Kombëtar i Gjendjes Civile gjenerohet formati elektronik i ekstraktit të përbërësve zgjedhorë brenda datës 30.12.2014, i ndarë sipas qendrave të votimit të zgjedhjeve të datës 23.6.2013 për çdo bashki/njësi bashkiake/komunë.

3. Nëpunësi i zyrës së gjendjes civile kontrollon raportin ditor, për numrin e zgjedhësve për çdo qendër votimi. Kur vëren në raportin ditor se ka qendra votimi me më pak se 200 zgjedhës, apo qendra votimi me më shumë se 1 000 zgjedhës, njofton brenda 48 orëve kryetarin e bashkisë/njësisë bashkiake / komu-nës. Këto lista gjenden në formatin e posaçëm dhe kanë të shkruar në sfond “jo për afishim” e mund të përdoren vetëm për ndarjen, apo bashkimin e qendrave të votimit sipas ligjit, por në asnjë rast nuk mund të përdoren për afishim, apo në faza të tjera të procesit zgjedhor. Gjithashtu në format të posaçëm, është edhe lista e zgjedhësve mbi 100 vjeç në datën e zgjedhjeve. Kjo listë i njoftohet kryetarit të bashkisë/njësisë bashkiake/komunës, për të bërë njoftimin e këtyre shtetasve për arsyen e mospasqyrimit në listën e zgjedhësve. Në format të posaçëm është edhe lista e zgjedhësve që e kanë numrin e qendrës së votimit të ndryshëm nga qendrat e votimit që i përkasin kësaj zyre të gjendjes civile.

4. Lista e zgjedhësve është e grupuar sipas zonave të qendrave të votimit. Kufijtë e zonave të qendrave të votimit janë ato të zgjedhjeve të fundit. Kryetari i bashkisë/komunës/njësisë bashkiake, i cili ka marrë njoftimin nga nëpunësi i zyrës së gjendjes civile, vendos bashkimin dhe/ose ndarjen e qendrave të votimit, sipas kërkesave të kriterit numerik dhe cakton vendndodhjen e saktë, adresën e plotë të qendrave të votimit.

5. Në rastet e qendrave të votimit me fraksion, të cilat kalojnë limitin numerik të përcaktuar në ligj, kryetari vendos ndarjen e tyre duke u nisur nga numri i përgjithshëm i zgjedhësve të qendrës së votimit bazë dhe jo çdo fraksion veç e veç. Numri i përgjithshëm i një qendre votimi, me gjithë fraksionet e saj, do të ndahet në pjesë të barabarta, me jo më shumë se 1000 zgjedhës secila.

6. Për qendrat e votimit me më pak se 200 zgjedhës, kryetari vendos bashkimin e kësaj qendre me një qendër më të afërt dhe me mundësi komunikimi rrugor, shuma e numrit të zgjedhësve, të të cilave duhet të jetë më shumë se 200 zgjedhës. Nëse shuma e numrit të zgjedhësve për qendrat që do të bashkohen është më shumë se 1000 zgjedhës, atëherë kryetari, pas bashkimit të këtyre qendrave, vendos ndarjen me fraksion të qendrës së votimit të krijuar, sipas pikës 5 të këtij udhëzimi. Nëse dy a më shumë qendra votimi kanë më pak se 200 zgjedhës, qendra/qendrat me numër më të vogël zgjedhësish i bashkohen qendrës me numër më të madh zgjedhësish.

7. Vendimet e kryetarit për ndarjen ose bashkimin e qendrave të votimit, si dhe ndryshimet e adresave të qendrave të votimit, nëse ka të tilla, do t'i dërgohen në formë shkresore për zbatim zyrës së gjendjes civile, Ministrisë së Punëve të Brendshme, Drejtorisë së Përgjithshme të Gjendjes Civile, si dhe për dijeni prefektit të qarkut përkatës, jo më vonë se 5 ditë nga marrja e informacionit nga zyra e gjendjes civile.

8. Përgjegjësi i zyrës së gjendjes civile, me marrjen e vendimit të kryetarit, për ndarjen e qendrave të votimit, brenda 24 orëve kryen veprimet e mëposhtme:

- a) në menunë majtas zgjedh “administrimi i qendrave të votimit”;
- b) zgjedh numrin e qendrës së votimit që do të ndahet;
- c) plotëson fushën e përshkrimit me shënimin “Sipas vendimit nr. ____ datë ____ . ____ . 2015 të kryetarit”;
- d) shtyp butonin “Ruaj”.

Ky informacion mund të ndryshohet deri në orën 24:00 të së njëjtës ditë. Në rast të mosrealizimit të ndryshimeve, Regjistri Kombëtar i Gjendjes Civile ekzekuton automatikisht kërkesën për ndarjen e qendrës së votimit sipas kriterit numerik dhe mbiemrit. Qendrat e votimit me fraksion marrin automatikisht adresën e qendrës së votimit bazë. Në rast se kryetari ka vendosur që adresa e qendrës së votimit me fraksion është e ndryshme nga adresa e qendrës së votimit bazë, përgjegjësi i zyrës së gjendjes civile korrigjon adresën e qendrës së votimit me fraksion.

9. Përgjegjësi i zyrës së gjendjes civile, me marrjen e vendimit të kryetarit për bashkimin e dy a më shumë qendrave të votimit, brenda 24 orëve kryen veprimet si më poshtë:

- a) në menunë majtas zgjedh “administrimi i qendrave të votimit”;
- b) zgjedh numrin e qendrës së votimit që do të mbyllet, si dhe numrin e qendrës së votimit pritëse;
- c) plotëson fushën e përshkrimit me shënimin “Sipas vendimit nr. ____, datë ____ . ____ . 2015 të kryetarit”;
- d) shtyp butonin “Ruaj”.

Ky informacion mund të ndryshohet deri në orën 24:00 të së njëjtës ditë. Në rast të mosrealizimit të ndryshimeve, Regjistri Kombëtar i Gjendjes Civile ekzekuton automatikisht kërkesën për bashkimin e qendrave të votimit sipas vendimit të kryetarit.

10. Procedura e përshkruar në pikat 4, 5, 6 dhe 7, do të zbatohet nga përgjegjësi i zyrës së gjendjes civile dhe nga kryetari përkatës, për çdo ekstrakt të përbërësve zgjedhorë.

11. Në rast se kryetari nuk përmbush detyrimet sipas pikës 4, 5, 6 dhe 7, të këtij udhëzimi deri në publikimin e ekstraktit të fundit para publikimit të listës së zgjedhësve, DPGJC-ja kryen menjëherë ndarjen dhe/ose bashkimin e qendrave të votimit sipas kriterëve të përcaktuara në ligj, të cilat reflektohen në listat e zgjedhësve të datës 21.6.2015.

12. Zyrat e gjendjes civile në bashki /komuna /njësi bashkiake, brenda datës 14.1.2015 printojnë dhe, pasi të firmoset nga kryetari përkatës, publikojnë ekstraktin e parë të përbërësve zgjedhorë të të gjithë zgjedhësve sipas vendbanimit dhe qendrave të votimit, nën juridiksionin e tyre territorial. Ekstraktet e përbërësve zgjedhorë, me të njëjtat kriterë, do të printohen dhe publikohen edhe çdo 30 ditë sipas përcaktimit të Kodit Zgjedhor.

13. Drejtoria e Përgjithshme e Gjendjes Civile i dërgon këto ekstrakte Komisionit Qendror të Zgjedhjeve dhe publikon ekstraktet e përbërësve zgjedhorë në faqen zyrtare të internetit të Ministrisë së Punëve të Brendshme. Në momentin e publikimit të ekstraktit të radhës, në faqen e internetit fshihet ekstrakti i mëparshëm.

14. Kryetari i bashkisë/komunës/njesisë bashkiake, brenda 60 ditëve nga publikimi i ekstraktit të parë, bën njoftimin me shkrim të zgjedhësve të përfshirë në ekstraktin e printuar sipas qendrave të votimit brenda territorit të bashkisë/komunës/njesisë bashkiake përkatëse.

Njoftimi për shtetasit do të jetë sipas modelit nr. 1, i cili gjenerohet nga sistemi.

Brenda këtij afati, kryetari njofton edhe shtetasit me moshë mbi 100 vjeç për arsyen e mospërfshirjes së tyre në listë. Njoftimi do të jetë sipas modelit nr. 2, bashkëlidhur këtij udhëzimi.

15. Zgjedhësit, të cilët kanë marrë njoftimin me shkrim nga ana e bashkisë/njesisë bashkiake/

komunës dhe konstatojnë se në përbërësit e tyre zgjedhorë ka mospërputhje, i drejtohen zyrës së gjendjes civile përkatëse për të bërë rregullimet e mundshme.

16. Të drejtën e kërkesës për përfshirjen në ekstraktin e përbërësve zgjedhorë dhe rregullimin e qendrës së votimit e kanë dhe shtetasit që kanë mbushur moshën 100 vjeç. Këta shtetas do të bëjnë kërkesë për ndryshim të qendrës së votimit nga 8899 (qendër votimi imagjinare e përdorur nga sistemi vetëm për këtë grup zgjedhësish), në qendrën e votimit sipas vendbanimit. Kjo kërkesë realizohet nëpërmjet formularit, sipas modelit nr. 3, bashkëlidhur këtij udhëzimi.

17. Krahas ndryshimit të përbërësve zgjedhorë në rrugë administrative, zyra e gjendjes civile do të pasqyrojë edhe rastet e vendimeve të gjykatës, deri në ditën e printimit të listës së zgjedhësve.

18. Çdo zyrë e gjendjes civile në bashki / njësi bashkiake / komunë, më datë 13.5.2015, printon nga Regjistri Kombëtar i Gjendjes Civile dhe firmos listën e zgjedhësve për çdo qendër votimi, duke përfshirë edhe institucionet e posaçme, nën juridiksionin territorial të saj dhe ia dorëzon kryetarit.

19. Kryetari miraton dhe firmos listën dhe e dërgon brenda datës 18.05.2015 në të tri formatet e parashikuara në Kodin Zgjedhor, në KZAZ-të përkatëse.

20. Drejtorja e Përgjithshme e Gjendjes Civile, jo më vonë se 30 ditë para datës së zgjedhjeve, i dërgon një kopje të printuar të listës së zgjedhësve Arkivit Qendror të Shtetit.

21. Për zbatimin e këtij udhëzimi ngarkohen kryetarët e bashkive/komunave/njësive bashkiake, Drejtorja e Përgjithshme e Gjendjes Civile, nëpunësit e zyrave të gjendjes civile në bashki/komuna/njësi bashkiake, si dhe institucionet e tjera shtetërore që parashikohen në Kodin Zgjedhor.

Ky udhëzim hyn në fuqi menjëherë dhe botohet në Fletoren Zyrtare.

MINISTRI I PUNËVE TË BRENDSHME

Saimir Tahiri

MODEL 1

Qarku: _____
Bashkia/ komuna/njësia bashkiake: _____
Numri banesës: _____

Të nderuar,

Z./znj. emri-emri i babait-mbiemri, datëlindja __/__/__, numri rendor në listë:____

Z./Znj. Emri-emri i babait-mbiemri, datëlindja __/__/__, numri rendor në listë:____

Z./znj. emri-emri i babait-mbiemri, datëlindja __/__/__, numri rendor në listë:____

Z./znj. emri-emri i babait-mbiemri, datëlindja __/__/__, numri rendor në listë:____

Ju njoftojmë se për zgjedhjet e organeve të qeverisjes vendore të datës 21.6.2015, jeni të regjistruar në listën e qendrës së votimi numër _____, me adresë: Shkolla/godina” _____”, rruga “_____”.

KRYETARI

(emër, mbiemër, firma)

MODEL 2

Qarku: _____
Bashkia/ njësia bashkiake/ komuna: _____
Numri banesës: _____
I/e nderuar/a
Z./znj. _____

Ju njoftojmë se për zgjedhjet e organeve të qeverisjes vendore të datës 21.6.2015, në mbështetje të nenit 51 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, si shtetas që keni mbushur moshën 100 vjeç, nuk jeni të përfshirë në ekstraktin e përbërësve zgjedhore të qendrës së votimit.

Sipas nenit 53 të Kodit Zgjedhor, për t’u përfshirë në listën e zgjedhësve, duhet t’i drejtoheni me kërkesë zyrës së gjendjes civile ku jeni i regjistruar.

KRYETARI

(emër, mbiemër, firma)

MODEL 3

KËRKESË

Drejtuar: Bashkisë/ njësisë bashkiake/ komunës,
Zyrës së gjendjes civile: _____

Unë i quajtur _____ banor i bashkisë/njësisë bashkiake/
(emër, atësi, mbiemër)

Komunës _____, pasi mora njoftimin nga kryetari, se nuk jam i përfshirë në listën e zgjedhësve të datës 21.6.2015, kërkoj nga ana juaj, të më shtoni në listën e zgjedhësve të qendrës së votimi nr. _____, aty ku janë të regjistruar edhe pjesëtarët e tjerë të familjes.

Emër, mbiemër

Data: __/__/____

